


山川典第七十五卷

太白山部彙考

郿縣之太白山

太白山與終南武功相連在今陝西鳳翔府郿縣東南四十里其山冬夏積雪故名或曰初有金星墜圭峯西其精化爲白石美玉焉故名山上有太白祠相傳旱禱輒應云

太白山圖





考

按辛氏三秦記太白山不知高幾許俗云武功太白去天三百山下軍行不得鳴鼓角鳴鼓角則疾風暴雨兼至也

按水經渭水注渭水又逕武功縣故城北王莽之新光也地理志曰縣有太一山古文以爲終南山杜預以爲中南也亦曰太白山在武功縣之南去長安二百里不知其高幾何俗云武功太白去天三百山下軍行不得鼓角鼓角則疾風雨至杜彥達曰太白山南連武功山於諸山最爲秀傑冬夏積雪望之皓然

按唐杜光庭洞天福地記第十一洞太白山周迴五百里名元德之天在明州

按地理通釋十道山川考關內名山太白在鳳翔府郿縣東南五十里漢武功縣地

按三才圖會太白山圖考太白山在西安府郿縣城東南四十里鍾西方金宿之秀關中諸山莫高於此其山巔高寒不生草木上有鐵鑄山神碣三曰大阿福二阿福三阿福有湫池雖三伏亦凝冰蓋山巔常有積雪不消盛夏視之猶爛然故以太白名關中遇旱則登山取湫然山既高寒冰雪常

凝身弱衣薄登山者多死俗傳以爲太白神能留人非也麓有鬼谷卽鬼谷子授蘇秦捭闔術處

按陝西通志山川考太白山在延安府鄜縣東南四十里四時積雪望之皓然初有金精墜圭峯西化爲白石若美玉故名巔無草木有湫三區禱卽雨山半有橫雲如瀑布卽大澍語曰南山瀑布非朝卽暮 又在慶陽府城北一百五十里黑水河發源於此 黑水源出太白山慶陽府城西一百二十里南流入寧州界

按鄜縣志地形考山曰終南在縣境曰太白山盛夏積雪望之皓然或曰初有金星墜圭峯西其精化爲白石若美玉爲故名不知高幾許巔無草木有湫三區山下軍行不鳴鼓角鳴則疾風暴雨立至云有神龍怪物又半山有橫雲如瀑布卽澍雨語曰南山瀑布非朝卽暮旱禱輒應人皆神之北爲四嶓山山巒若疊嶂迤邐陵高比登太白峰俯瞰如岡阜焉南連武功諸山最爲秀傑語曰武功太白去天三百武功今訛爲鑒山又曰垂山西曰瓦窰山又西曰駝羊峯抵斜谷接岫連麓周廻五百里不絕爲關中名山其西南紅崖頭曰馬鞍山一曰馬嶺山西北附原者曰巖斗山山產防風此隨地爲名不與太白聯接焉

祠祀考太白山祠自北齊制方澤始從祀崑崙皇地祇至唐元宗時山人李渾以符瑞得幸天寶三年立元元廟於臨淄舊邸欲塑像帝夜夢神人曰太白山北谷中有玉石可取而琢之紫氣見處是也翌日令工入谷求之山下人云旬日來常有紫氣連日不散果於其下掘得玉石琢爲元元像高二尺許服袞冕當展南面又爲二真人二侍童諸帝后侍立左右皆朱衣朝服并有李林甫陳希烈之形各高六尺七載李渾有言於山見神人金星洞有玉板石記寶符靈藥爲聖主福壽之徵命御史中丞王珙從仙遊谷求而獲焉明年閏六月乃封山爲神應公并加聖祖及諸帝后號諡九載冬十月太白山人王元翼上言元元皇帝降寶仙洞言洞中有妙寶真符珙奏聞帝遣珙等於洞中得玉石函上清護國經寶券紀籙等獻之時帝遵道教慕長生所在爭言符瑞羣言表賀無虛日林甫等請舍宅爲觀以祝聖壽則廟祀疑自此始然妄誕不經貞元十二年旱甚分命禱祀詔京兆尹韓臯下令旬邑載飾祠廟時聞喜裴均令整屋統承制詔繕終南山祠并新太白山祠三倍於舊翌日大雨賜詔嘉異後唐清泰入宋祥符並加繕理仍令有司歲時致祭而奉事始專矣皇祐五年春夏不雨工部郎中直龍圖閣知鳳翔府軍事李昭遠兩遣迎湫連獲大雨乃具狀奏請封爵至和二年

敕封太白山湫爲濟民侯仍令本府差官祭告昭邁承詔揭其公爵就舊祠後抗殿宅濟民侯位然所以肇山有三神蓋亦萌於二殿云嘉祐六年復大旱時宋選知府事而眉山蘇軾簽書判官公事外集所云爲扶風從事者也乃諭父老境內可禱者咸云太白至靈自昔有禱輒應近歲向傳師少卿爲守奏封山爲濟民侯自茲禱不驗軾檢唐書會要以天寶十四年詔封山爲靈應公卽請太守遣使祝之若應當奏復公爵且令以瓶取水歸郡水未至風霧相纏幡旗乘舞彷彿若有所見遂大雨三日歲大熟越明年乃代作奏檢具言其狀請復公爵當年牒奉敕旨特改封明應公本府差官祭告且修廟祀之日有白鼠歷酒饌上嗅而不食父老曰龍也而其說則近誕云熙寧八年南郊肆赦詔天下祠廟禱祀靈應及有爵號褒崇未稱者並以名聞太常禮院准中書批送鳳翔府狀太白山湫事由看詳敕敕進福應王太白封王實自此始厥後共傳合并二神妄言於朝降秩弗順紹聖三年河南李漉芻以朝列大夫充祕閣校理知鳳翔府蹟狀以聞復改公爵易號爲濟遠後又進爲惠濟王金元俱仍王爵而普順惠民靈應則自元始並號爲三不知何時鎔鐵爲主稱曰阿福而各以行著曰大曰二曰三甚可異焉大抵蒙古語取福利生民云爾至於以三著行則自明應濟民二

殿並列厥後封爵數更並存未廢著人耳目因山有三峯遂成附會而一切時俗陋說紛然旁出則矯誣甚矣明興表立嶽鎮在秦實惟華吳太白支山未列正祀其前代不經封號悉從蠶革嘉靖初值歲旱蝗蝻以來知縣瑀徧於羣神以缺太白之祀奏請當道於南壇後舉太白之祀會巡撫松石劉公天和按部至郿詢及靈異因命瑀禱霖雨傾盆自郿至陝入地尺餘十年西鳳並旱布政果齋羅公躬禱山祠雨隨興至達近霑足益神之自請撫臺議列祀典牒下兩府春秋分祭後以遣委不便專屬本縣編入規則至丙寅直指池州方公新登山謁祠謂山三神非也乃以唐李白稱謫仙李太白明孫一元稱山人孫太白就故廟側建祠與高山靈應太白陪位稱三白祠兩人以詩名有逸才而公雅好遊覽賦詩故爲標榜云萬曆初奉撫院檄發公鏹鑄爲瓦形繕廟山巔復鑿山通道計程作屋以便朝謁焉歷代崇奉如此祠凡三一在山下爲唐宋古跡國朝正統四年重脩去縣治四十里里人稱曰高廟宋天禧元年轉運使梅詢曾宿此寺一在清湫鎮未詳建自何時元至明成化間皆重脩也萬曆元年又脩一在城南百餘步原在縣門西十步建自元至正二十三年明弘治八年重脩後廢爲陰陽醫學嘉靖十年移建於此洪武十三年有祈禱靈應碑今亡祇存改建碑仆

焉

太白山部藝文一

太白山祠記

唐柳宗元

雍州西南界於梁其山曰太白其地恆寒冰雪之積未嘗已也其人以為神故歲水旱則禱之寒暑
乖候則禱之厲疾崇降則禱之咸若有答焉者貞元十二年孟秋旱甚皇帝遇災悼懼分命禱祀至
於茲山有詔京兆尹宜飾祠廟遂下令於旬邑邑令裴均臨事有恪恭去狹陋恢弘棟宇階室之廣
三倍其初翌日大雨黍稷用豐野夫謹謠欽聖信神願垂頌聲刻在金石時尹韓府君諱臯祇奉制
詔發付邑吏令裴府君諱均承荷君之命督就祠宇蒞事謹甚克媚神意用護顯貺邑人靈之其事
遂聞詔書嘉異勞主者甚厚乃刻茲石立於西序右階之下肆刻裴氏之政於碑之陰曰惟君教行
於家德施於人撫字惠厚柔仁博愛之道洽於鰥嫠廉毅肅給威斷猛制之令行於疆禦訟獄不私
於上罪責不及於下農事課勵厚生克勤徵賦首入而其人益贍創立傳館平易道路改作基力而
其人彌逸韓府君每用褒嘉稱其理為旬服最令茲設廟位神神歆而寧宜為君之誠敬克合於上

用啟之也

封濟民侯敕

宋仁宗

禮五岳視三公四瀆視諸侯非有豐功曷膺上爵太白山湫名山之下神龍所潛每遇旱暘必伸請禱能爲霖雨以澤民田守臣上言蒙福甚遠宜降十行之詔用疏五等之封以答神休以從人欲特封濟民侯

封明應公敕

同前

太白之山岐陽之望能致雲雨澤及一方守臣上言位未稱德願因唐之舊復正公爵之榮苟利於民則吾豈吝特改封明應公本府差官祭告准敕故牒

進福應王敕

神宗

朕躬執圭璧郊見上帝覬爲萬民蒙嘉氣獲美祥旣又詔天下凡山林川谷之神能興雲雨殖財用有功烈於民而爵號未稱者皆以名聞將徧加禮以褒顯之如此非特以爲報也蓋聖王制祀所當然也惟神聰明正直庇於一方供民之求如應影響守臣列上朕甚嘉焉論德報功疏錫王爵俾民

奉事不懈益恭

請封太白山狀

李昭遠

臣謹按祭法山林川谷能出雲雨見怪物皆曰神有天下者祭百神諸侯在其地則祭亡其地則不祭又漢郊祀志湫淵陳祠天下山川隈曲往往有之臣本府管縣有九郡其一也縣有太白山山在縣南四十里謹按圖經載辛氏三秦記在武功縣南去長安三百里不知高幾許俗云武功太白去天三百山下軍行不鳴鼓角鳴則疾風暴雨立至周地圖記云上常積雪無草木半山有橫雲如瀑布卽澍雨常以爲候故語曰南山瀑布非朝卽暮乃知茲山候雨自古而然神靈尸之宜有禱應也山有廟未詳建置之始唐世祀之正元中詔京兆尹韓臯重修後唐清泰復加繕葺國朝祥符三年專遣使修完春秋邑令致祭列在祀典山巔有湫每歲旱府及他境必取水禱雨無不卽驗朝廷近年累遣內臣投寶龍簡臣自到任以來詢訪前後之異其事旣出傳聞不敢寫錄今年春三月當府並皆少雨麥苗頗悴兼妨種穀臣遣公人迎致湫水初水在道天興縣雨至七寸及水到府是夕九縣普偏得雨復一尺五寸因此豌豆二麥始蘇穀種獲播今豌豆收持已畢雖斂穫猶歉比他州軍

放却租稅此爲薄稔自三月下旬雨後當府兩月不雨穀苗弗滋晚種秋色皆未播種公人復請迎水臣諭以神道安靜迎請之煩殆成喧瀆巫覡市人日往歌舞亦乃勞止臣偕通判職官分詣在府祠廟致禱以十七日遣縣令賈蕃齋祝文香酒祈於神廟衆志徒恪俱未有應公人勤請甚于厥初義不可拒二十七日迎水到府自是三日連得微雨三十日雨至八寸六月三日丑後雷雨繼作天興九縣滂沱周足因此穀根涵潤及下晚種蕎禾逐一並具兩次奏訖非臣獨言道路之人不可誣也伏見朝廷恤民崇祀甚厚且恭前件太白山本前世欽奉之地靈貺昭晰古今共信其太白湫水欲望聖慈特加封爵兼聞慶曆七年河南府王屋縣析城山聖水泉特封爲淵德侯其例未遠可舉而行或蒙報可實慰羣願謹具陳請以聞伏候敕旨

濟民侯廟記

前人

皇祐甲午秋九月予被詔守岐間歲春三月閔雨飭躬齋禱寂然無應詢諸耆艾或曰太白有湫舊矣每衍亢祈禱其應甚速遂擇老吏之可使者面命而往迎致湫水厥初在道天興等六邑僅得數寸之潤亦既至止其夕諸邑滂沱逾尺變悴以滋易憂以喜夏五月復然其靈應之異先後如一遂

具列其實抗章以聞秋七月詔封湫水爲濟民侯按地理志太白山在郿縣境內上常積雪半有橫雲如瀑布卽澍雨故有候雨舊語之驗山有廟未詳建置之始復按唐天寶七載山人李渾言符瑞事封山爲神應公廟中有殿無題榜之號今因濟民詔下遂營置華榜揭其公爵復構殿於後以宅濟民之位始議必葺也邑人懼然從之或出財以給費或獻技以効力曾未逾時而厥工告畢噫時雖今昔事必宜稱在其地而乃祭制孰可踰躋於閔而失序變固必興今二殿之列君子謂得其宜矣神歆人悅據古協義不有和氣之應未之有也

太白山禱雨文

蘇軾

維西方挺特英偉之氣結而爲此山惟山之陰威潤澤之氣又聚而爲湫潭鉅罍勺可以雨天下而況於一方乎乃者自冬徂春雨雪不至西民之所恃以爲生者麥禾而已今旬不雨卽爲凶歲民食不繼盜賊且起豈惟守土之臣所任以爲憂亦非神之所當安坐而熟視也聖天子在上凡所以懷柔之禮莫不備至至於愚夫小民奔走畏事者亦豈有他哉凡皆以爲今日也神祇盍亦鑒之以無負聖天子之意下以無失愚夫小民之望尙饗

代宋選請復公爵狀

前人

伏見當府鄆縣太白山雄鎮一方載在祀典按唐天寶八年詔封山爲神應公迨至皇朝始改封侯而加以濟民之號府界自去歲九月不雨徂冬及春農民拱手以待饑饉粒食將絕盜賊且興臣採之道途得於父老咸謂此山舊有湫水試加請禱必獲響應尋令擇日齋戒差官莅取臣與百姓待於郊外風色慘變從東南來隆隆獵獵若有驅導既至之日陰威凜然油雲蔚興始如車蓋既日不散遂彌四方化爲大雨罔不周飫破驕陽於鼎盛起二麥於垂枯鬼神雖幽報答甚著臣竊以爲功效至大封爵未充使其昔公而今侯是爲自我而左降揆以人事殊爲未安且此山崇高足亞五嶽若賜公爵尙虛王稱校其有功實未爲過伏乞朝廷更下所司詳酌可否特賜指揮伏候敕旨

告廟文

前人

天作山川以鎮四方俾食於民以雨以暘惟公聰明能率其職民以旱告應不踰夕帝謂守臣予嘉乃功惟新爵號往耀其躬在唐天寶亦賜今爵時惟術士探符訪藥謂爲公榮實爲公羞中原顛覆神不顧救今皇神聖惟民是憂民旣飽溢皇無禱求袞衣煌煌赤舄繡裳舍母卽新以祐我民尙饗

夢遊太白山賦

并序

明康海

余歷覽載籍所志古人之辭由屈原宋玉以來不可勝計而浮靡侈放之辭蓋託諷寓興者之所共趨上林之後益蕪益漫亡能爾雅志士之所賤也余感風人之義因夢遊太白山歷見奇瑰駭異之狀乎於人言退而作賦凡若干言雖極假借要皆自喻其迹少有虛謬馭駕陵絕之病示諸同志皆曰可錄

弘治闕逢攝提格終相之月康子夢遊太白山與金子可卿乘馬領僕各執糧糗餼飼之物浮漆渭跨鄜塢環悼物逾武功去約萬里四望塞蔽恐怖獐突惶惑震厲若將遂爲虎豹之嚙有老人者雪髭鶴髮電目龍顏自西而來若愛若識請以前路則笑而不言少頃復去金子曰若山川之精耶豈將疑我以迷晦顧我以虛誼也乃躡其後則豁然四開巒回徑折泉下雲散予曰是未可止也夫八紘之廣獨有太白盤礴崑嶠鬼嶂崎嶇神靈秀朗磅礴巖辟夫是但謂末麓近壑然未窵也乃與虬蛭亥石轉附垂藤升闢巉壁靜肅絕岸忽萬里之瞬側何溟渤之未窮雜卉菁蔥石泉沸騰嘉樹驂乎九御神風颯乎太絃驟駢散乎鉢粒蛟螭視乎細繩電光恍乎山足雷聲浩乎廣聽零露凝其在衣

松濤悠乎啟聲金子曰快哉遊乎夫造物者假我以聖智崇我以令德我弗用觀奈此膚景遂直詣
而不回何茫迷之物騁乃爾若神物之可馮歷千巖之邃嶺山石儼乎華嵩細流浩乎滄溟蓬蒿翳
乎峯壑墜葉震乎雷霆老人跨鶴雲前下笑曰異乎子之善勇也夫太白始峯炎暑冰沍萬夫之勇
亡有敢及況迨於是夫是泉脈應乎坤軸遮飾極乎越區天扃邇乎可聲神祇恍乎可呼至循崖之
前重谷之裏百鳥不宿神獸亦避雖至人亦蔑有入也越此百里西下陰壑復闊峻嶽則金屋龍棟
控亢聳搏異花雜乎瓊瑤仙風冷乎清綽靈芝馥乎滿郊麒麟馴乎盈郭龍蹇屈於平池鳳翽聯於
長漠此則上帝之祕區而太白之闕鑰也其東百里瑤宮藥殿萬戶齊啟蒼光青氣四回周起函丹
書於億笈紛朱紵於兆徵散靈籙之如斗歷綺縠之奇靡總百綵而具存奚瓊桃之如繫此又太乙
之宅合陽之宮至其南也朱雲陸離丹閣霽霽神桂宿日南極奉塵羽翰極乎麗暉珠貝極乎雕飾
鵬鵬駕而鳳軒鯨鯢御而兕履是謂朱明之宮天帝之闕北則至幽號曰元府紫微之所宿萬象之
所聚玉臺瑩光冰桂炫色珊瑚府如林水晶四徹雲沈寥而守默氣鬱森而馳起靈龜元龍參差其下
松檜接乎帝闕金碧曳乎泉石翼八獸以守衛役百神而司臬夫皆五天之至精萬化之樞紐能有